

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ
ҚАРОРИ

859 Ўзбекистон Республикаси сайловчиларининг Ягона
электрон рўйхатини шакллантириш ва юритиш чора-
тадбирлари тўғрисида

Ахборот-коммуникация технологияларини кенг жорий этиш йўли билан Ўзбекистон Республикасининг сайлов жараёнини янада такомиллаштириш мақсадида Вазирлар Маҳкамаси **қарор қилади:**

1. Ўзбекистон Республикаси Марказий сайлов комиссияси томонидан Ахборот технологиялари ва коммуникацияларини ривожлантириш вазирлиги билан биргаликда сайлов жараёнига Ўзбекистон Республикаси сайловчиларининг Ягона электрон рўйхатини (кейинги ўринларда СЯЭР деб аталади) жорий этиш ишлари амалга оширилаётганлиги маълумот учун қабул қилинсин.

2. Белгилаб қўйилсинки:

СЯЭР «Электрон ҳукумат» тизимини яратиш доирасида амалга оширилади;

СЯЭРни яратиш ва СЯЭРни шакллантиришга йўналтирилган идоравий ахборот тизимларини такомиллаштириш билан боғлиқ харажатлар Ахборот-коммуникацияларини ривожлантириш жамғармаси ҳамда СЯЭРнинг ишлашини техникавий таъминлаш учун кўмаклашишга Корея Республикаси томонидан ажратиладиган грант маблағлари ҳисобига амалга оширилади.

3. Ўзбекистон Республикаси сайловчиларининг Ягона электрон рўйхатини шакллантириш ва юритиш тартиби тўғрисидаги низом иловага мувофиқ тасдиқлансин.

4. Ўзбекистон Республикаси Ахборот технологиялари ва коммуникация-

Ўзбекистон Республикаси қонун ҳужжатлари тўплами, 2017 й.

ларини ривожлантириш вазирлиги манфаатдор вазирликлар ва идоралар билан биргаликда:

СЯЭРни яратиш бўйича бош пудратчини белгилаш юзасидан бир ой муддатда Ўзбекистон Республикаси Вазирлар Маҳкамасига таклиф киритсин;

2017 йил декабрь ойида бўлиб ўтадиган Тошкент шаҳри халқ депутатларининг туманлар Кенгашларига сайловлар давомида ахборот тизимининг СЯЭРни шакллантириш ва юритишни назарда тутувчи тажриба тартибида фойдаланилиши ҳуқуқий эксперимент сифатида амалга оширилишини, 2018 йилнинг 1 апрелигача эса — СЯЭРни яратишни ва бутун мамлакат бўйича ишга туширишни таъминласин;

икки ой муддатда — жисмоний ҳимоя ва ахборот хавфсизлигини таъминлаш юзасидан зарурий чоралар таъминланишини ҳисобга олган ҳолда СЯЭРни амалга ошириш тadbирлари режасини тасдиқласин.

5. Вазирлик ва идоралар ўзлари қабул қилган норматив-ҳуқуқий ҳужжатларини бир ой муддатда ушбу қарорга мувофиқлаштирсинлар.

6. Мазкур қарорнинг бажарилишини назорат қилиш Ўзбекистон Республикаси Ахборот технологиялари ва коммуникацияларини ривожлантириш вазири вазифасини бажарувчи Ш.Х.Шерматов зиммасига ҳамда Ўзбекистон Республикаси Вазирлар Маҳкамасининг Маданият, ахборот тизимлари ва телекоммуникациялар масалалари ахборот-таҳлил департаментига юклансин.

**Ўзбекистон Республикасининг
Бош вазири**

А. АРИПОВ

Тошкент ш.,
2017 йил 15 август,
630-сон

Вазирлар Маҳкамасининг
2017 йил 15 августдаги 630-сон қарорига
ИЛОВА

**Ўзбекистон Республикаси сайловчиларининг
Ягона электрон рўйхатини шакллантириш ва юритиш
тартиби тўғрисида
НИЗОМ**

1-боб. Умумий қоидалар

1. Ушбу Низом Ўзбекистон Республикасининг «Фуқаролар сайлов ҳуқуқларининг кафолатлари тўғрисида», «Ўзбекистон Республикаси Президенти сайлови тўғрисида», «Ўзбекистон Республикаси Олий Мажлисига сайлов тўғрисида», «Халқ депутатлари вилоят, туман ва шаҳар Кенгашла-

рига сайлов тўғрисида», «Ўзбекистон Республикаси Марказий сайлов комиссияси тўғрисида», «Ахборотлаштириш тўғрисида» ва «Электрон ҳукумат тўғрисида»ги қонунларига мувофиқ Ўзбекистон Республикаси сайловчиларининг Ягона электрон рўйхатини (кейинги ўринларда СЯЭР деб аталади) шакллантириш, юритиш, янгилаш ва ундан фойдаланиш тартибини белгилайди.

2. СЯЭР Ўзбекистон Республикасининг 18 ёшга тўлган, доимий ёки вақтинча турар жойга эга бўлган, муомалага лаёқатли, суд ҳукми билан озодликдан маҳрум этиш жойларида сақланмаётган фуқаролари (кейинги ўринларда сайловчи фуқаролар деб аталади) киритиладиган давлат ахборот ресурси ҳисобланади.

3. СЯЭРга киритилган сайловчи фуқароларнинг шахсий маълумотларидан иборат бўлган ахборотлар билан ишлаш тартиби Ўзбекистон Республикаси Марказий сайлов комиссияси (кейинги ўринларда МСК деб аталади) томонидан белгиланади.

4. СЯЭР сайлов жараёнини бошқариш бўйича ахборот тизими (кейинги ўринларда СЖБАТ деб аталади) воситасида шакллантирилади ва унинг таркибига кирилади.

Қуйидагилар СЖБАТнинг асосий вазифалари ҳисобланади:

хавфсиз алоқа каналлари бўйича идоравий ахборот тизимлари ва маълумотлар базалари билан интеграциялаш орқали СЯЭРни шакллантириш жараёнини автоматлаштириш;

рўйхатларга тузатиш киритиш имконияти билан сайлов участкалари бўйича сайловчи фуқароларни тақсимлаш воситаларини тақдим этиш;

сайловчи фуқароларга ўз сайлов участкаларига оид ахборотлар билан танишишга ва сайлов участкасини ўзгартиришга сўровнома юбориш имконини бериш;

СЯЭРда сақланадиган маълумотлардан фойдаланувчиларнинг фойдаланиш ва сайлов участкалари бўйича рўйхатларга тузатиш киритиш ҳуқуқларини тақсимлаш.

5. Ўзбекистон Республикаси Марказий сайлов комиссияси СЖБАТ ва унинг таркибига кирувчи СЯЭРнинг эгаси ҳисобланади.

2-боб. СЖБАТ оператори

6. Ўзбекистон Республикаси Ахборот технологиялари ва коммуникацияларини ривожлантириш вазирлиги СЖБАТ оператори (кейинги ўринларда Оператор деб аталади) ҳисобланади.

7. Қуйидагилар Операторнинг асосий вазифалари ҳисобланади:

СЖБАТни яратиш, янада такомиллаштириш ва унга техникавий хизмат кўрсатиш;

СЖБАТнинг самарали ва узлуксиз ишлашини таъминлаш;

СЖБАТни идоравий ахборот тизимлари ва маълумотлар базалари билан интеграциялаш;

СЖБАТнинг ахборот хавфсизлигини таъминлаш чора-тадбирларини амалга ошириш.

3-боб. СЯЭРни шакллантириш тартиби

8. СЯЭР:

Ўзбекистон Республикаси Вазирлар Маҳкамаси ҳузуридаги Давлат персоналлаштириш маркази (кейинги ўринларда ДПМ деб аталади) томонидан ушбу Низомнинг 2-бандига мувофиқ тақдим этиладиган сайловчи фуқаролар тўғрисидаги;

сайлов кампанияси даврида сайловчилар рўйхатларини аниқлаштириш орқали сайлов комиссиялари томонидан тақдим этиладиган сайловчи фуқаролар тўғрисидаги ахборотлар асосида шакллантирилади ва янгилаб борилади.

СЯЭР бир йилда бир марта, сайлов кампанияси даврида эса МСК томонидан ДПМ ва Оператор билан келишилган ҳолда тасдиқланган жадвалга мувофиқ янгиланади.

9. Қуйидаги давлат органлари (кейинги ўринларда ваколатли органлар деб аталади) ДПМга тегишли маълумотларни электрон шаклда тақдим этадилар:

а) Ўзбекистон Республикаси Ички ишлар вазирлиги:

фуқароларнинг доимий ва/ёки вақтинчалик яшаш манзили тўғрисида;

фуқаролиги белгиланган тартибда тугатилган шахслар тўғрисида;

озодликдан маҳрум этиш тарзидаги жазони ўташ муассасаларида жазони ўтаётган шахслар тўғрисида;

озодликдан маҳрум этиш тарзидаги жазони ўташ муассасаларидан озод этилган шахслар тўғрисида;

вазирлик тизимидаги таълим муассасаларида таълим олаётган фуқаролар тўғрисида — сайлов бошланишидан уч ой аввал;

муддатли ҳарбий хизматни ўтаётган ва вазирлик тизими ҳарбий қисмларидаги фуқаролар тўғрисида — сайлов бошланишидан олти ой аввал;

б) Ўзбекистон Республикаси Адлия вазирлиги — фуқароларнинг ўлимини рўйхатга олиш тўғрисида;

в) Ўзбекистон Республикаси Мудофаа вазирлиги:

вазирлик тизимидаги олий ҳарбий таълим муассасаларида таълим олаётган фуқаролар тўғрисида — сайлов бошланишидан уч ой аввал;

муддатли ҳарбий хизматни ўтаётган ва ҳарбий қисмлардаги фуқаролар тўғрисида — сайлов бошланишидан олти ой аввал;

г) Ўзбекистон Республикаси Соғлиқни сақлаш вазирлиги — судлар томонидан муомалага лаёқатсиз (лаёқатли) деб топилган фуқаролар тўғрисида;

д) Ўзбекистон Республикаси Ташқи ишлар вазирлиги — яшаш давлатини (хорижий давлатда Ўзбекистон Республикасининг дипломатик ваколатхонасини) кўрсатган ҳолда доимий ёки вақтинчалик консуллик ҳисобида турган фуқаролар тўғрисида.

10. Масъул идоралар ушбу Низомнинг 9-бандига мувофиқ ДПМга маълумотларни электрон шаклда жисмоний шахснинг идентификация рақамини (у мавжуд бўлмаганда — Ўзбекистон Республикаси фуқароси паспортининг серия ва рақамини), фамилияси, исми ва отасининг исмини кўрсатган ҳолда, фуқароларнинг жойлашган жойи (давлатлар, Ўзбекистон Республикаси вилоятлари, туманлари, аҳоли пунктлари ва кўчалари) тўғрисидаги маълумотларни эса ДПМ ва Оператор билан келишилган маълумотномалар (кейинги ўринларда маълумотномалар деб аталади) асосида юборадилар.

11. ДПМ қуйидагиларни таъминлайди:

ушбу Низомнинг 9-10-бандларига мувофиқ ваколатли органлардан фуқаролар тўғрисидаги маълумотларни олиш;

ваколатли органлардан келган маълумотни идентификациялаш;

Ўзбекистон Республикаси фуқаролари рўйхатидан сайлаш ҳуқуқига эга бўлмаган фуқароларни чиқариш;

ушбу Низомнинг 12-бандига мувофиқ сайловчи фуқаролар тўғрисидаги ахборотни электрон шаклда Операторга тақдим этиш.

12. СЯЭРни янгилаш ДПМ томонидан Операторга ҳарбий хизматчилардан ташқари, сайловчи фуқаролар тўғрисидаги рўйхатни электрон шаклда узатиш йўли билан қуйидагиларни кўрсатган ҳолда амалга оширилади:

жисмоний шахснинг шахсий идентификация рақами (мавжуд бўлганда);

Ўзбекистон Республикаси фуқароси паспортининг серияси ва рақами;

давлат ва инглиз тилларида фамилияси, исми ва отасининг исми;

маълумотномалар асосида жойлашув (яшаш) жойи манзиллари.

4-боб. СЯЭРдан фойдаланишни ташкил этиш тартиби

13. СЖБАТ «Электрон ҳукумат» тизимининг маълумотларни қайта ишлаш марказида жойлашади.

14. МСК СЖБАТдаги Ўзбекистон Республикасининг сайловчи фуқаролари рўйхатига кириш имкониятига эга.

Қорақалпоғистон Республикасининг Марказий сайлов комиссияси, вилоят, туман ва шаҳар, округ ва участка сайлов комиссиялари СЖБАТдаги тегишли ҳудуд бўйича сайловчи фуқаролар рўйхатидан фойдаланиш имкониятига эга.

МСК ва тегишли сайлов комиссияларининг СЖБАТдан фойдаланиш имкониятлари «Электрон ҳукумат» тизимининг маълумотлар узатиш тармоғи орқали амалга оширилади.

СЖБАТда сайлов комиссияларининг масъул ходимлари идентификацияси «Электрон ҳукумат» тизимидан фойдаланувчиларни Идентификациялашнинг ягона ахборот тизими орқали амалга оширилади.

5-боб. Сайловчи фуқаролар рўйхатини сайлов участкалари бўйича тақсимлаш ва у билан танишиш тартиби

15. Сайловчиларнинг ҳуқуқларини амалга ошириш, уларга тегишли

маълумотлар билан танишиш ҳамда овоз беришни ўтказиш учун ҳар бир сайлов участкаси бўйича сайловчи фуқароларнинг рўйхати шакллантирилади.

Сайловчи фуқароларни рўйхатлар бўйича тақсимлаш СЖБАТда округ сайлов комиссиялари томонидан сайлов участкаларининг белгиланган чегаралари доирасида амалга оширилади. Бунинг учун СЖБАТда сайловчи фуқароларнинг рўйхатлари Ўзбекистон Республикасининг аҳоли пунктлари ва кўчалари, шунингдек Ўзбекистон Республикасининг чел элдаги ваколатхоналари бўйича тақдим этилади.

16. Сайлов участкаларининг сони ёки чегаралари ўзгарган тақдирда округ сайлов комиссияси 24 соат мобайнида СЖБАТга тегишли ўзгартиришларни киритади.

17. Сайловчи фуқаролар рўйхати амалдаги қонун асосида ҳамманинг танишиб чиқиши учун тақдим этилади.

Сайловчи фуқаро ўзи бириктирилган сайлов участкаси, манзили ва жисмоний шахснинг шахсий идентификация рақамини киритиш йўли билан МСК расмий веб-сайтнинг электрон картасида сайлов участкасининг жойлашуви (дислокацияси)га оид ахборот билан танишиш имкониятига эга.

18. СЯЭРда сайловчи фуқаро бўлмаганда ёки унинг сайлов участкаси мос келмаган тақдирда сайловчи фуқаро участка сайлов комиссиясига тегишли ўзгартиришлар киритилиши бўйича ариза билан ёзма ёки МСКнинг расмий веб-сайтида электрон шаклда мурожаат қилиш ҳуқуқига эга.

6-боб. Яқунловчи қоидалар

19. СЯЭРни шакллантириш ва юритиш тартиби схемаси иловада келтирилган.

20. Ваколатли органлар СЯЭРни шакллантириш ва янгилаб бориш учун маълумотларнинг ишончлилиги, долзарблиги ва ўз вақтида тақдим этилиши юзасидан масъулдирлар.

21. Мазкур Низом талаблари бузилишида айбдор шахслар қонунчиликка мувофиқ жавоб берадилар.

Ўзбекистон Республикаси
сайловчиларининг Ягона электрон рўйхатини
шакллантириш ва юритиш тартиби
тўғрисидаги низомга
ИЛОВА

**Ўзбекистон Республикаси сайловчиларининг
Ягона электрон рўйхатини шакллантириш ва юритиш
СХЕМАСИ**

